

德壯果公年譜

德壯果公年譜卷六

次孫花沙納恭纂

時苗疆戡定而達州賊氛甚熾公旣奉

命偕明亮迅速起程遂一意赴川勦辦邪匪矣

嘉慶二年丁巳

二月二十四日

公奏言臣於二月初八日行至新甯接據觀成英善飛札

內稱張家觀賊巢業已攻克東鄉縣治亦經收復賊匪現

據金義寺勢仍猖獗令臣將現領川兵卽赴金義寺之西

勦堵臣卽同提臣穆克登阿鎮臣達音泰於初九日馳抵

楊柳坪軍營面晤宜縣觀成英善會商進剿事宜適接明
亮札知現在賊匪在金義寺負嵎抗拒詢之土人均稱東
鄉祇須嚴密堵禦並無鄰近賊巢路徑可以進攻現查馬
伏山緊臨金義寺之上如在彼紮營安兵向下壓攻最爲
扼要臣所帶川兵三千名先因金義寺之南兵力不敷卽
經派撥五百名交遊擊沈宗文帶領在白瓦溝添防又查
達州兵力甚單東鄉所屬之羅江口在金義寺之西亦係
達州緊要隘口亦派留五百名交參將胡尚賢帶赴添防
所餘川兵二千名臣卽帶領於十三日前赴馬伏山軍營
會同籌勦其後到之滇兵現已飛催迅速行走臣惟與明

亮宜縣等和衷熟籌趕緊辦理

三月二十五日奉

旨陞授鑲黃旗漢軍都統

四月初七日

公偕明亮宜縣奏言查雞爪嶺爲賊巢正東一帶門戶自經官兵奪據扼其咽喉料賊匪定來攻撲當飭鎮臣朱射

斗艾如文等率川陝官兵及綽斯甲並五寨士兵於雞爪嶺之上連營分駐又撥鎮臣索費英阿所帶之兵於綦盤

石擎卡二處聯絡聲勢適臣德楞泰已自楊柳坪一路察

看地勢於十八日馳抵馬耳峯軍營與臣明亮宜縣會同

親履各處查閱營卡二十一日丑刻賊匪率衆分路前來
每路約千餘人由大冉家埢口陳家坪龔家灣四處直撲
雞爪嶺各營另一路直衝棊盤石卡座臣等督率將弁帶
兵分投進剿因時在昏夜恐雞爪嶺山徑溝磽難辨飛飭
艾如文朱射斗等先用大小礮轟擊誘賊上嶺然後突出
勦殺比賊匪行至嶺下見官兵不卽出敵以爲得計分燃
火炬一擁上嶺該二鎮率將弁及屯土各兵同聲呐喊衝
出營盤槍箭刀矛奮力攬殺當將四路前隊賊匪三百餘
人盡行殲斃後隊之賊卽回身捷走時天色將曉官兵乘
勢下壓賊眾益形錯亂拋棄器械及追至嶺下副將長春

曾於十三日殺賊時得受槍傷猶復率千總何化龍等催
兵追擊沿途又殺傷數十人其衝撲棊盤石一路之賊經
達音泰索費英阿等領兵緊對賊人來路用槍礮轟打擊
斃甚多賊匪始退該二鎮仍帶兵衝殺下山賊從寨內擁
出多人接應抗拒抗拒見攻撲雞爪嶺四路之賊俱各狂奔
敗回衆賊始奪路亂逃敗入寨去計殺斃五百餘人割獲
首級七十一顆生擒王作虎吳國良度有才黃添佑等四
十四名奪獲槍矛器械九十二件大小礮三位臣等當將
出力弁兵逐一獎賞仍令各營卡兵勇嚴密守禦次日巳
刻賊匪復率三四千人直撲萬古樓鄉勇卡座查該處在

賊巢東北因官兵不敷分駐

臣

等於鄉勇中挑取奮勇者

三千人訓練鼓勵派外委劉邦華鄉勇頭羅恩舉王道益等管領設營堵禦賊匪不能東竄希圖西擊該鄉勇等在

卡望見卽分隊排列山腰併力轟擊賊始稍退又分一股

欲從山溝繞至山後衝撲經

臣

等派侍衛溫春富僧德都

司蒲尙佐等帶領策應之兵勇由馬耳峰溝底迎頭截殺鄉勇等亦自上下壓首尾夾擊賊人情急穿林越澗四處

奔逃除兵勇分投追殺五十餘名之外所有攔截溝內之

賊痛加殲戮所餘無幾並生擒符士貴王登明李有貴等

十七名

臣

等逐一研訊據供該首逆等欲命執旗頭人於

附近村莊焚掠糧食何處營卡可以衝開卽向何處搶掠
又聽得首逆等計議以金義寺山勢陡險可以屯聚又欲
派人暗從西南山陰取道往明月場羅江口搬搶糧食並
欲邀合王家寨方山坪兩處屯聚之賊入夥可以固守拒
敵官兵等語臣等核其情辭似屬可信羅江口一帶現因
兵力短少分駐鄉兵雖多究不足恃自須急爲籌畫適後
起川滇各兵俱已行抵達州因卽令提臣穆克登阿副都
統銜巴圖魯西津泰等前往率領相地分布以堵賊人西
竄並飛飭該處守營將弁留心防範茲於二十四日據參
將增順遊擊王霖等稟報二十二日有賊匪二三千人至

重石子地方焚掠該參將卽率兵勦堵截殺多人賊人退
據重石子山顛屯劄遊擊托克托布因奮勇殺賊臨陣捐
軀遊擊薛大烈亦殺賊受傷尙不甚重

臣

等伏查金義寺

賊巢四面山巒縣瓦南至新甯一百四十里東至開縣二百六十餘里北至太平縣二百五十里西至達州一百四十里方山坪王家寨一百八十里賊人情急分竄在所不免萬一進攻太急致賊人向山間小道奔逃恐未經被擾村莊復被蹂躪總須先將四面隘口一一分防妥帖使賊匪驅歸一處無路潛逃然後將各營卡向前挪移漸逼漸緊以期一鼓殲擒至連日各路打仗受傷陣亡兵丁容俟

查明咨部其生擒之王作虎符士貴等六十一名卽行正法梟示再現在圍剿賊匪四路安兵周圍道路遙遠各路軍火軍糧最關緊要查達州爲糧餉總彙運撥之所不可無大員督率運籌臣等公同商酌臣英善應在達州駐劄督催分運臣觀成奎舒勒禮善分駐達州東鄉緊要隘口稽查後路遇有急需堵剿之事卽可就近派撥臣明亮宜縣德楞泰駐劄前敵相機籌剿又查王家寨方山坪二處賊匪經總兵百祥署遊擊羅定國等分投堵剿茲據百祥稟稱王家寨西北之鮮家坪鷹嘴一帶係通方山坪大路賊匪屢思竄合經都司李洲守備蘇維龍千總馬國柱

等分帶兵勇連營扼要已有圍攻之勢又據羅定國稟稱
賊匪連日出擾附近方山坪之觀紫寨等處經該都司率
領兵勇極力堵截賊匪不敢復出惟該二處兵力尙單未
便冒昧進剿臣等趕緊籌商俟四路營卡分設妥密卽當
酌量抽撥分往協剿

二十一日

公偕宜縣明亮奏言查金義寺清溪場兩路賊巢地勢雖
俱陡峻而清溪場局面較小屯賊不過四五千人若金義
寺則南北西三面皆係危崖峭壁惟東面冉家埡口稍覺
平衍稻田環繞水深沒膝由小路盤旋而上山頂寬廣約

三十餘里周圍樹立木城木城之內又有土牆一道高有丈餘包絡山峰十一座寨勢甚爲險固屯賊二萬餘人二十七日大霧瀰漫清溪場之賊來撲清溪口營盤經柯藩明興督率參將王清弼等帶領兵勇出營截殺殲斃甚多金義寺賊衆亦撲中山頭大卡經守備張東林竹谿縣典史道玉岷督率兵勇竭力堵禦賊匪恃其人衆不肯卽退臣等卽派總兵達音泰巴圖魯侍衛溫春阿那保等帶兵馳赴中山頭助剿賊衆見我兵繞出其後始行退郤張東林等帶兵乘勢壓下達音泰等迎頭截殺共殺賊二百餘名生擒張順等二十三名奪獲大礮鳥槍刀矛等件餘賊

卽翻山逃至重石子嗣後霧雨不時賊匪分撲各路營盤均被官兵勦退

臣

等密相計議賊匪見官兵圍逼漸緊糧

食將盡不能出外擄掠自分必死是以屢次恃衆衝突但

兩處賊巢附近周圍二百餘里若必步步設卡圍堵始行

攻勦兵勇不敷派撥且亦耽延時日莫若趁我兵屢勝分

投攻取巢穴使之進退失據勦辦似易爲力因密行知會

各路約期並舉四月初三日天色稍霽柯藩明興等自清

溪口攻清溪場之西觀成等自東鄉攻清溪場之南奎舒

等自姚家壩攻其東

臣

等復派達音泰等帶兵自馬耳峰

攻其北賊匪毫不畏懼經守備楊萬年等率領奮勇兵丁

鄉勇李子清羅思舉李子秀等首先躍上木城砍開寨門
兵勇一擁而入賊人捨命抵禦楊萬年及千總陳尙賢外
委祁紹堯古萬龍皆身受重傷殞命都司達自祥士遊擊
安朋鄉勇李子秀亦經身受槍傷殺斃賊人一千餘名生
擒賊首王學禮奪獲槍礮軍器無數遂奪清溪場賊寨其
攻打金義寺之索費英阿等由雞爪嶺進兵艾如文等由
張家碥進兵穆克登阿等由余家巖進兵副都統銜西津
泰等由姚家寨進兵五路會攻冉家埡口賊卡臣明亮德
楞泰帶領侍衛巴圖魯等繼進查冉家埡口爲金義寺門
戶賊人拒守甚堅千總郭德元王大倫把總馬玉成外委

胡德貴余正明從九品職員熊鈞衡等奮力奪卡皆被礮傷陣亡我兵人人憤怒奮勇齊進賊匪不能抵抗棄卡而逃我兵占住冉家壠口距賊巢尚有五里皆自下仰攻

臣

等因該處離大營稍遠恐兵丁心志不固一面用大礮轟打賊寨一面自馬耳峰往下連黎木城十四座直接冉家壠口時天已昏黑金義寺賊匪見官兵扼其咽喉賊巢諒不能保賊首王三槐等帶領强悍賊匪數千人下山攻撲木城賊首徐添德等潛率老弱婦女由山後僻處滾崖而下偷赴重石子初四日五鼓我兵正在上山攻打賊巢王三槐等自高壓下勢甚洶湧我兵無不以一當百刀矛亂

下賊衆大潰除殺斃不計外生擒一百三十五名所得糧食什物分賞出力兵勇搶獲大礮三十六位鳥槍二百餘桿刀矛軍械五百餘件存貯備用當將金義寺賊寨燒燬

臣等酌留索費英阿暫住搜山

臣德楞泰督同西津泰朱

射斗艾如文等分路追剿徐添德等逃竄之賊沿途擒殺七百餘人柯藩明興亦自清溪場帶兵邀之陰洞殺死賊匪三百餘人搶獲大礮八位軍器一百餘件觀成帶兵邀之淺灘子亦殺死二百餘人王三槐等欲由羊烈子過河竄往新甯穆克登阿督同副將達柔阿帶兵邀截於鹽店子殲斃及落水者約數百人王三槐等竄入重石子賊營

查該處及香鑪坪賊黨尙不下二萬餘人臣等現在四面圍逼務期設法擒拏首惡仰紓

聖塵至王學禮一犯訊係與徐添德同時起事僞封軍師現擬暫行羈押俟拏獲徐添德等一同解京連次出力文武員弁

查明開單請

旨加恩其陣亡受傷兵勇另行造冊咨部賞卹

諭曰金義寺等處賊匪負嵎固守經宜縣等督率將領分路進兵先將清溪場賊寨攻克隨將金義寺賊巢燒燬拏獲賊目一名殲斃多賊所辦可嘉此次宜縣與明亮和衷商辦而分路帶兵各員打仗殺賊均屬奮勉宜縣明亮著各賞給金盒白玉搬指

大小荷包德楞泰柯藩各賞銀絲盒玉搬指大小荷包觀成穆
克登阿各賞碧玉搬指大小荷包奎舒達音泰索費英阿朱射
斗艾如文西津泰各賞搬指大小荷包以示獎勵其餘文武各
員俱著咨部議敘所有躍入木城砍開寨門之兵丁等著查明
首先奮勇出力者卽超補千總餘俱以把總外委酌量拔補其
陣亡之守備楊萬年千總陳尙賢郭德元王大倫把總馬玉成
外委祁紹堯古萬龍胡德貴余正明從九品職員熊鈞衡俱著
咨部加一等議卹打仗兵丁俱著賞給一月錢糧其受槍傷之
都司達自祥土遊擊安朋等想已調治平復如能始終奮勉亦
著以應陞之缺陞用

二十九日

己未年正月二十一

公偕宜縣明亮奏言伏查賊匪分屯重石子香爐坪互相首尾其東茨菇梁其西富成寨兩處據險設卡以爲障蔽臣等細加籌酌若賊匪復與王家寨方山坪之賊勾結勢更鴟張必須嚴密防範分投撲奪庶不致曠日持久遂派參將增順等帶領兵勇駐劄大羅坪參將雷仁等帶領兵勇駐劄古隘口都司三格等分帶兵勇駐劄瓦窑壩雙河場等處防其竄入王家寨提臣穆克登阿副都統職銜西津泰駐劄羅江口防其窺伺達州副將達桑阿等駐劄羊烈子副將王承勲等駐劄江口梁參將瑪靈阿駐劄金義

寺防其南入新甯東回故巢

臣

明亮率索費英阿侍衛巴

圖魯等連攻富成寨賊卡穆克登阿西津泰由羅江口抽

撤兵勇前往協勦

臣

德楞泰率達音泰朱射斗巴圖魯侍

衛等進攻茨姑梁賊卡觀成奎舒明興率遊擊李逢春等

由鐵丁亞帶領兵勇前往協勦並飭鎮

臣

百祥等速行相

機攻取王家寨十二日方山坪賊匪四五千人欲赴重石

子合夥直撲大羅坪經增順及遊擊圖興阿典史余永甯

等竭力擊退其同時往劫古隘口營盤之賊經雷仁及都

司李洳等督率兵勇奮勇勦殺相持一晝夜賊匪始行敗

退其瓦窯壩雙河場二處賊匪亦分隊衝突經都司三格

等截殺而退十二日方山坪賊匪來撲王家寨之鷹背嘴
頭卡遊擊謝開先率鄉勇堵禦而王家寨之賊二千餘人
下山從後湧至義首武舉邢彪監生王選力戰陣亡勢甚
危急百祥及知府李杭等密計王家寨賊率衆下山其巢
必虛當派遊擊哈三泰等帶領兵勇由東水卡潛進遊擊
王相龍等帶領兵勇暗取板橋子要卡守備李廷臣等帶
領鄉勇由白罐子進攻百祥李杭率都司蘇維龍等帶兵
急援鷹背嘴賊匪分投抗拒正在酣戰之際千總拜登齧
把總陳子現外委楊必著撲上水卡拜登齧陳子現皆受
傷陣亡楊必著拋擲火彈將草房燃著哈三泰等併力奪

卡守寨之賊尙有千餘人急往救援王相龍及守備李廷
臣知縣王駿猷席世綱兩路俱至遂入賊巢放火燒寨賊
衆在虜背嘴望見火光知巢穴有失無心戀戰趕回搶救
百祥等乘勢追殺哈三泰王相龍等亦自上壓下兩面夾
攻賊衆大潰殺死賊匪五百餘名生擒陳有才等二十一
名落崖跌死者無算餘匪逃回方山坪奪獲大礮過山鳥
鳥槍刀矛共三百餘件留貯備用糧食牛馬除分賞出力
兵勇外尙餘穀一千二百石撥交糧臺碾米備用其日重
石子香爐坪之賊亦分路來撲我兵營卡欲爲王家寨方
山坪應援俱經臣等督率兵弁施放槍礮擊敗而去十四

日霧雨交作

臣

等議計茨菇梁富成寨兩處賊人正在設

卡天雨必不准備我兵掩至可望得手遂派副將德甯等

帶領官兵分路前進已午間雨勢更大我兵皆在泥水中

攀援而上賊人始猶滾木擲石捨死抗拒干總馬彪秦廷

玉受傷殞命賊人究因寨柵初立尙未完固且我兵奮勇

異常賊人力不能支棄卡而逃互相踐踏殺斃及墮崖者

不計其數生擒一百一十三名同王家寨解到之陳有才

等二十二名訊無要供立予駢誅

臣

明亮等進據富成寨

臣德楞泰進據茨菇梁距賊巢甚近並據百祥報稱移駐

大羅坪爲進攻方山坪之計其路通巴州之江口

臣等另

派守備楊東林協同巡檢余廷勲帶領兵勇在對河嚴密
防守一俟天氣晴明臣等卽親率將弁兵勇分投攻擊務
期一鼓蕩平肅清川境此次出力文武員弁俟查明同前
奪獲賊卡攻破賊寨連次出力員弁統行開單請

旨加恩並陣亡兵勇造冊各部賞卹

諭曰宜縣等奏督率官兵攻克王家寨賊巢並茨菇梁富成寨兩
處賊卡乘天雨無備之時分投奪獲所辦可嘉宜縣明亮德楞
泰著各賞金盒大小荷包觀成穆克登阿著各賞銀玲瓏盒大
小荷包奎舒百祥索費英阿達音泰朱射斗西津泰明興著各
賞青玉搬指大小荷包百祥乘機攻取王家寨賊巢尤爲出力

該鎮前在孝感帶兵打仗業經賞戴花翎著加恩賞提督銜其
出力文武員弁俱著咨部議敘此次官兵能冒雨進攻均屬奮
勉著查明加恩各賞給一月錢糧以示鼓勵其陣亡之于總拜
登鼇馬彪秦廷玉把總陳子現武舉邢彪監生王選俱著咨部
加等優卹

五月初九日

公偕宜縣明亮奏言臣等攻克巴州王家寨後明亮自富
成寨拏卡至馬市口德楞泰自茨菇梁率領鎮將巴圖魯
侍衛至田家山之西合洲坪黃馬村一帶拏卡五處田家
山之東李家山土寺坪一帶拏卡四處均係樹立木柵逼

近賊巢賊人無分晝夜或千餘人或數百人連次分撲各營卡經臣宣鯨先期傳令加意巡防各兵勇均有准備俱

隨時擊退擒斬多人四月二十日黎明賊匪竟欲攻撲羅

江口窺伺達州潛出四千餘人攀崖援磴分爲三路直抵

鐵丁埡頭卡遊擊魏攀舉鼓勵兵勇槍箭並施賊不得過

猶敢恃其人衆相持逾時終不肯退穆克登阿一面用大

礮轟擊使賊知有策應一面密派參將姜敏功遊擊陳大

定等帶兵分往埋伏截其後路副都統銜西津泰督率遊

擊陳天雲候補知縣劉大經等帶領兵勇赴鐵丁埡助剿

賊匪見官兵漸近捨命衝突魏攀舉親率奮勇兵丁出卡

衝擊西津泰等亦合力搶上山梁賊匪不能抵抗紛紛退下我兵乘勢追逐觀成派佐領努赫稜自達州後山帶領滿兵由鳳凰嘴壓下三面截殺賊眾大潰姜敏功陳大定等埋伏之兵先後衝出沿途邀截賊匪首尾不能相顧擒斬甚多其時臣宜祿明亮亦派副將玉柱遊擊王霖等帶領兵勇邀擊於楊家坪斬獲無數賊匪四散竄歸巢穴兵勇分路追殺賊匪自相踐踏及跌死者不計其數統計殺賊三百餘名割取首級一百二十一顆生擒二十四名搶獲槍矛一百三十五件二十二日天氣陰雨重石子賊匪潛出一千餘名分爲三股來撲李家山新卡臣德楞泰

督同鎮臣達音泰巴圖魯侍衛阿納保帶領漢土官兵分

爲三隊迎頭截殺而香爐坪賊匪復分二千餘人抄襲合

洲坪黃馬村新卡

臣德楞泰飛派鎮臣

朱射斗巴圖魯侍

衛溫春等帶領漢土兵丁及鄉勇迎至黃金坪搶上山梁

賊分四路撲拒相持兩時之久我兵奮勇攻擊賊匪不能

抵禦始行竄散斃賊四百餘名生擒十一名搶獲槍矛七

十餘件所有兩次生擒賊匪余祥榮等訊無要供當卽梟

斬臣明亮德楞泰正在乘勝督催鎮臣

索費英阿巴圖魯

侍衛等分路進攻重石子香爐坪賊寨無如雨水盛大槍

礮不能施放賊人等滾木擂石一齊壓下兵勇皆在泥水

中站腳不住傳令暫退俟雨勢畧止卽當督率將弁分投
攻剿務期擒拏首逆其出力文武員弁及陣亡受傷兵勇
統俟查明各部辦理

諭曰重石子香爐坪等處賊匪因官兵拏卡進逼分路攻撲經宜
縣等督率將領擊退並伏兵邀擊殲斃賊匪所辦尙好惟當乘
勢進攻上緊會剿

十八日

公偕宜縣明亮奏言查賊匪分屯重石子香爐坪二處其
地固不若金峩寺之險峻而四面亦係陡岸惟有綫路可
上賊匪將路逐節挖斷連設木卡四道以爲障蔽臣明亮

德楞泰前經分路拏卡東南自田家山至黃馬坪土寺坪西南自富成寨至馬市口雖已逼近賊巢山頂瞭望棚帳了然而深溝曲折環繞相距尙有十餘里及七八里不等路徑處處可逼賊人屢思乘間逃竄臣宜縣等連日細察情形若不嚴密防堵還爾進剿不惟仰攻爲難兼恐賊人情急四竄追擊更爲棘手因查黃馬村之前有分水嶺一道土寺坪之前有火石嶺一道賊人設卡甚多不可不先行搶占臣德楞泰奎舒明興於初二日率同巴圖魯侍衛墨爾津保鄂爾綏副將德甯等由黃馬村進攻分水嶺頭卡賊匪抵死抗拒官兵奮勇齊上卡內滾木檑石紛下如

兩千總治正華把總馬德元外委高進保張廷迺等首先躍入砍斃數賊賊人力不能支乘卡奔竄後卡之賊見前卡已失不敢抵抗官兵乘勝追擊連奪數卡殺賊二百餘名生擒陳必倫等二十六名其治正華等四人均受傷陣亡當將分水嶺一道盡行奪獲卽分派將弁兵勇設卡駐守初三日臣明亮觀成率同總兵朱射斗巴圖魯侍衛阿納保等爲一路臣德楞泰奎舒明興率同總兵達音泰侍衛安慶等爲一路分撲火石嶺同時並進左右夾擊賊人出卡排立嶺上分投抵禦官兵進至山嶺之半賊人施放槍礮兼用木石擲擊我兵用擋牌抵住呐喊爭先一擁而

上刀砍槍擊斃賊甚多守備常萬青千總余海把總楊崑
戴福皆身受重傷陣亡屯都司根登太土守備格宗扎什
將執旗頭人砍死一名生擒廖繼賢一名賊眾慌亂兩路
官兵合圍將火彈拋入卡內草棚火起賊人自相踐踏及
燒斃者不計其數生擒汪訓等十五名餘賊竄歸巢穴

臣

等一面督率將弁追擊一面分派兵勇趕拏卡座自午至
酉拏定十五卡因時已薄暮尚有數卡未拏香爐坪重石
子賊匪於是夜亥刻傾巢而出分撲各卡幸溝壘已挖築
齊備官兵槍礮齊施賊人連撲數次傷斃無數後隊不敢
前進潛回賊寨提訊廖繼賢供稱係徐添德大徒弟西營

總領頭目與陳必倫汪訓等四十一名概予駟誅初四日
天明督率將弁於緊要處所連拏九卡直達河邊與東面
東琳河副將王承勲南面羊烈子遊擊沈宗文西南面羅
江口副都統銜西津泰提督穆克登阿營卡相接東南北
三面已漸逼緊惟西面自富成寨南至羅江口北至瓦密
壩都司三格營卡中間相隔二十餘里尙須設卡防堵又
由馬市口前進地名南子山尖山二處緊臨賊巢必須占
據拏卡使賊人無處躲避方可得手現在兵丁不敷分駐
未便輕進臣英善續調梁山等屬鄉勇甫據具報起程臣
明亮德楞泰抵川時因東鄉賊匪數萬巴州亦有賊匪屯

聚大甯縣屬九龍池等處復有蠢動之事兵力實不敷用
查苗疆尙有未經撤回粵兵四千餘名皆係屢經打仗得
勝之師如由永綏秀山來至川省行走尙捷當卽札詢畢
沅等撤出粵兵曾否回省可否截留茲據畢沅等咨稱粵
兵行抵辰州適接臣等前札卽令取道由水路入川伏思
川省賊匪刻下情形與臣明亮德楞泰初到時稍有不同
但粵兵旣已入川未便令其轉回現在重石子香爐坪尙
有賊匪二萬餘人巴州大甯之賊均未殲除且商鄖一帶
竄匪未淨臣宜縣已於隨來陝甘官兵內撥一千五百名
交柯藩艾如文先帶回陝是川省多帶一兵卽多一兵之

益現在粵兵尙無到營信息除飛催趕到聽調一俟到時
卽將羅江口至瓦窑壩一帶布置嚴密併力攻勦

諭曰此次宜縣等督兵奪占山梁竊殲賊匪實爲出力可嘉現在
東南北三面均已掣卡緊逼賊巢籌畫尤爲得宜宜縣明亮德
楞泰著各賞玉喜字牌大小荷包觀成奎舒朱射斗達音泰著
各賞大小荷包其因勦賊受傷陣亡之守備常萬清千總治正
華余海把總馬德元楊崑戴福外委高進保張廷廸俱著咨部
加一等議卹

二十六日

公偕宜縣明亮奏言

臣

等奪占分水嶺火石嶺兩處山梁

賊匪被圍緊急連次來撲營卡俱被兵勇擊退亟圖分路逃竄查賊巢東南北三面官兵營卡較密而西面白羅江口至瓦窯壩二十餘里稍覺空虛賊匪若乘虛西竄方山坪或折而北入陝境與楚匪彼此接應均爲可慮臣等隨

趕緊招募本地鄉勇四千五百名派參將瑪靈阿帶領配以官兵分安上下毛坪及各要隘口嚴密巡查設卡把截

臣宜縣移駐大成寨係中西兩路適中之地以便往來策

應臣明亮仍駐富成寨臣德楞泰仍駐茨菇梁探明賊匪

從何路竄逸卽就近派兵截殺初八日賊匪二三千人潛赴花潭子欲由彼處過渡竄入新甯經防守東琳河副將

王承勲帶領兵勇追擊穆克登阿西津泰聞槍礮之聲隨卽帶兵截回殺斃賊匪多名臣等思賊匪聲言南竄更不

可不注意西北遂傳令西北各卡加意防守十三日五鼓

賊首王三槐果率衆四五千人分爲五路直撲北路毛坪

一帶營卡臣德楞泰卽帶領巴圖魯侍衛溫春副將德甯

等帶領漢土官兵由萬古樓前往接應又令總兵達音泰

同巴圖魯侍衛安慶等帶領兵勇由張家山從旁截殺總

兵朱射斗同巴圖魯侍衛墨爾歡保等帶領兵勇由黃家

山赴觀音坪從後抄截觀成奎舒明興卽分投在各營卡

往來督兵堵禦臣宜縣明亮聞報卽督率總兵索費英阿

等馳往督戰賊匪衝入毛坪鄉勇頭卡瑪靈阿帶兵二百
名從高壓下守備樊模王玉龍等帶領鄉勇分兩翼繞出
其後奮勇攻擊賊匪力不能支而達音泰朱射斗溫春等
亦帶兵趕到併力截殺賊匪大敗王三槐中槍落馬賊目
鄭文禮卽將自己所乘之馬給王三槐乘騎而逸兵勇趕
上將鄭文禮擎住又有王三槐之義父賀宗盛中槍倒地
一併擒獲此次獲賊十一名共計斃賊三百餘名奪獲各
器械收存備用隨將賀宗盛鄭文禮二犯及所獲餘匪分
別磔梟示眾臣等思賊勢日就窮蹙若就現有之兵直撲
賊巢似亦無難攻克但重石子香爐坪兩處有名賊首俱

在其中設令衝出追捕反爲費力現在粵兵及各屬鄉勇
陸續可到臣等卽分投帶領攻取香爐坪重石子兩處賊
巢一面督飭各營卡四面截殺賊匪旣不能堅守本寨又
無路可以逃生定可一戰成功至方山坪之賊於本月初
六七等日連次下寨搶割麥豆俱經總兵百祥督率參將
雷仁增順等分帶兵勇奮力截殺斬獲甚多查方山坪地
面遼闊山勢險固百祥帶兵僅止二千未能歲事現駐劄
大羅扼其要害匪徒不敢大肆鳴張俟勦辦東鄉賊匪竣
事後臣等卽酌量情形分帶弁兵進剿以期迅速歲事
諭曰此次賊匪潛逃花潭子地方欲圖竄逸經宜縣等派兵分路

截殺殲斃多人所辦俱屬可嘉宜縣明亮德楞泰著各賞鑲寶
石帶環喜字牌玉搬指大小荷包觀成穆克登阿奎舒著各賞
金盒密蠟喜字牌大小荷包達音泰索費英阿百祥朱射斗西
津泰明興著各賞玉搬指洋玻璃盒大小荷包以示優獎

六月十二日

公偕宜縣明亮奏言查重石子香爐坪屯聚賊匪經臣等
節次剿殺嗣粵兵及各州縣鄉勇陸續到營隨將周圍營
卡布置完妥臣等猶恐賊衆衝突又於峩城山七里峽等
處各要口分布兵勇豎立營柵以爲外層防堵二十六日
天色稍霽臣德楞泰率同總兵朱射斗達音泰巴圖魯侍

衛等由田家山前進攻重石子

臣

明亮率同提臣穆克登

阿副都統銜西津泰總兵木騰額巴圖魯侍衛等由黃家

寨前進攻香爐坪

臣

宜縣明興督同索費英阿等在兩路

之中策應黎明各抵山下

臣

德楞泰等令兵勇分班輪番

攻打賊寨自寅至午寨上滾木擂石將盡都司尤漢玉等

首先搶上寨門我兵一擁而進火焚草棚延燒殆徧寨內

賊匪二千餘人概被燒斃賊眾慌亂我兵刀砍矛刺餘賊

冒烟衝出其香爐坪之賊倚恃高險抗拒甚力率眾壓下

三次

臣

明亮等督率兵勇仍復撲上相持半日賊匪見重

石子火起驚慌無措四散衝突我兵迎頭截殺賊匪退回

上山者約二千餘人兵勇四面密圍射入火箭風急火烈
寨內之賊無一倖免其兩處逃出之賊藏匿溝內是夜大
雨如注兵勇皆露立困守凡東西北三面賊匪竄逃之處
俱經兵勇截殺折回惟迤南一帶山勢重疊雖經設有營
卡而延長三十餘里路途散漫賊匪連夜翻山滾巖紛紛
遁逸其時副將德甯玉柱帶兵趕至截住後起之賊臣明
亮德楞泰亦經追至兩路夾擊復殲斃二千餘人餘眾俱
上蔣家山至陳家塢屯紮臣等督率官兵圍住山腳二十
七日賊匪四面衝突經臣德楞泰督令副將扎勒杭阿王
承勲分投堵剿殺死三百餘人生擒劉體全等三十二名

隨提同二十六日所獲賊匪楊升元等四百八十七名逐一研訊據供徐添德等因官兵四面逼緊正想衝出重圍投奔巴州方山坪合夥不料官兵夾攻措手不及是以各自逃竄求生又據劉體全供係徐添德大徒弟劉學仙之父徐添德等逃出後本要直奔新甯無如官兵各路追趕而峩城山七里峽一帶又有營卡攔阻未敢衝出祇有暫住陳家壩再看機會等語當卽分別磔梟所獲馬驃分賞兵勇大礮十五位鳥槍刀矛八百餘件收貯備用各路割獻首級二千餘顆及槍斃落河屍軀分委員弁帶領眼目查認有無逆首賊目在內再行稟報查此次斃賊不下萬

人賊中夙稱戰手者被殺過半且峩城山等處營卡周密

賊勢較前更爲窮蹙

臣

等現在上緊攻剿斷不敢絲毫疎

懈至楚省逆匪頭起已由興安竄至川省太平之大竹河

前曾派委川北道李鋐遊擊謝開先等督率鄉勇堵禦彼

時正在四面兜圍之際不能分撥兵力

臣

恐該處民心驚

惶先發傳牌聲言兩廣官兵四千名全赴太平迎剿民心

稍定今此間兵數已可稍省

臣

宜絲酌量緩急現復抽派

二千名交宋射斗統領趕至太平如楚匪已全夥入境卽

將各隘口分布堵禦俟惠齡等帶兵到日前後夾攻二三

起尙未入川卽先將頭起之賊殲除趕赴西鄉紫陽一帶

與惠齡等會勦二三起之賊

諭曰據宜縣奏報攻克重石子香爐坪賊巢一摺覽奏欣悅此次官兵兩路進攻雖未擒獲賊首而各路殲賊不下萬餘强悍者已殺斃過半所辦尙屬可嘉宜縣著賞給嵌珠帶板帶環蜜蠟喜字牌大小荷包明亮德楞泰著賞給鑲寶石帶頭帶環蜜蠟喜字牌大小荷包穆克登阿西津泰朱射斗達音泰木騰額索費英阿明興著賞給嵌松石金盒大小荷包都司尤漢玉首先搶上寨門得受槍傷甚爲奮勇如果始終出力著超陞參將其打仗陣亡之千總陳裕後等均著咨部加等優卹打仗出力之兵著酌賞以示鼓勵

二十二日

公偕宜縣明亮奏言查賊匪竄至陳家壩後並於附近之苦草壩安子坪冉家壩汪家山分隊屯紮臣等當將各營卡兵勇酌量抽調分布堵勦自陳家壩移營前進初三日臣德楞泰督率總兵達音泰等由天星橋之南臣明興率同副將德甯長春等帶領兵勇由天星橋之北直搶冉家壩生擒賊目王德貴等三十一名臣明亮穆克登阿西津泰督率巴圖魯侍衛等帶領兵勇由蘇家坪直搶安子坪生擒賊目陳明彩等二十七名兩路官兵乘勢追勦賊匪蹤躉奔竄帳房器械沿途拋棄初四日進抵苦草壩汪家

山賊眾自知不能抵禦復退屯精忠寺山包

臣明亮穆克

登阿紮營其南

臣德楞泰達音泰紮營其北另派副將扎

勒杭阿等帶領官兵由七里峽赴觀音山協同原派將弁

截其東竄新甯之路又派守備樊模等帶領鄉勇在山坡

埋伏是日夜半賊匪欲由觀音山梁竄走潛至半山兵勇

槍礮齊發殺死賊匪四百餘人餘眾不能竄出始行退去

守備樊模因黑夜撲入賊羣身受矛傷殞命初五日賊匪

復糾集醜類覓路逃生

臣德楞泰急率達音泰等帶兵前

往截殺賊匪相持不退達音泰射死執旗賊目二名侍衛

等亦各射死賊匪數名乘勢壓下漢士各兵奮勇攻擊賊

始暫退旋又傾巢而出與官兵接仗兇悍直前不避槍礮
西津泰首先衝入賊隊手刃十餘名賊衆披靡其勢稍卻
遊擊陳天雲陳大定繼之兵勇一擁而進賊匪力不能支
始行敗退西津泰及陳天雲皆身受重傷陣亡臣明亮德
楞泰穆克登阿督率各兵乘勢剿殺其時千總陳華領帶
鄉勇羅思舉等從山後撲入賊營賊衆紛紛奔竄三面官
兵槍礮並施極力殲戮自寅至午凡殺賊二千餘人生擒
男婦三百餘人內熊泳明係熊泳霞之弟與亢作俸均係
僞總兵徐王氏係徐添德之母徐大才係徐添德之姪王
楊氏係王三槐之母熊泳明受傷甚重與餘賊先行分磔

梟示並訊據亢作俸等供稱賊匪分爲兩股徐添德王三槐等帶領一股向西奔竄孫老五現帶一股尙在精忠寺附近之磨子壩山溝內屯紮等語初六日黎明臣明亮穆

克登阿卽帶兵勇往西勦殺徐添德等一股

臣德楞泰查

看磨子壩一帶松林茂密延長十餘里下皆稻田路徑紆仄遠望炊煙騰起臣宜縣等在精忠寺山梁催趨各兵勇

預備策應

臣

德楞泰率同達音泰等步行聯絡而進將抵

磨子壩副將玉柱見前面高嶺上有騎馬賊目身穿綾襖正在率眾指揮該副將趕上用槍擊中賊目滾跌下礮賊衆敗退玉柱等壓下山坡適有賊數人帶領夥黨從旁趕

到捨命格鬪以致玉柱及都司安如洞守備蕭文印受傷陣亡臣德楞泰率領巴圖魯侍衛等與賊匪奮力抵敵撲

壓數十次賊眾潰散我兵分投追趕當將賊匪一千餘人

殲戮淨盡並拏獲胡成榜等七十二名訊據胡成榜供稱

中槍落馬之賊係教首孫老五訊之餘賊眾供確鑿查首

逆孫老五卽孫嗣鳳在教匪中輩分最高賊眾均稱孫老

師父卽徐添德等無不拱手聽命凡陝西之興安四川之

達州巴州湖北之來鳳等處該犯傳徒甚衆實爲三省傳

教首惡去歲從太平起事旋又竄至東鄉數月以來倅逃

顯戮此番雖未能生擒正法而臨陣殺斃亦足以快人心

徐添德王三槐等雖一時免脫然窮蹙之餘其勢諒不能

遠竄

臣德楞泰現在星夜整兵會同

臣

明亮等竭力圍剿

臣宜縣飛飭迤西各卡加意嚴密相機截殺此次陣亡受

傷弁兵鄉勇查明分別咨部其節次打仗尤爲出力之文

武員弁開單呈

覽

諭曰宜縣等奏官兵連日殲戮賊匪槍斃首逆孫老五並擒獲各
首逆家屬所辦俱好奮勇可嘉惟西津泰殺賊陣亡深爲可惜
著咨部照副都統例議卹玉柱陳天雲安如洞蕭文印樊模均
著加等議卹所有出力文武員弁均著照所請加恩此次打仗

兵勇著賞給一月錢糧以示鼓勵現在賊勢已形窮蹙但楚匪兩股竄入太平一股竄入通江俱與方山坪近而徐添德王三槐西竄勢亦欲與方山坪之賊合夥雖經宜縣派令朱射斗穆克登阿先後帶兵前往太平一帶截剿但所帶兵僅二千八百名未免稍單而楚匪全夥竄入恐不足以資堵禦惟望宜縣與明亮德楞泰上緊追捕迅擒首逆移師前往幫同截剿而惠齡彼時亦可由北夾擊則姚之富李全王廷詔齊王氏等自難逃逸

二十七日

公偕宜縣明亮奏言據川北道李鋐等稟報賊匪三起先

後竄入太平之城口及魚渡壩等處城口主簿蔣曰紀帶領鄉勇向前堵禦連次殺賊二百餘人因衆寡不敵遂被戕害並有一股在通江之竹谿關到處焚掠是以臣復酌派穆克登阿帶兵前赴通江預備迎擊茲以楚北賊匪由陝偷渡漢江竄入川界奉

旨命

臣

宜縣總統一切軍務跪誦之下惴懼萬分就目下情形而

論太平一帶地方極關緊要

臣

等三人自應酌量分兵力

籌兼顧第現在川省賊匪自經官兵攻克重石子香爐坪

等處雖殲斃已逾萬餘而首逆徐添德等尙未全擒

臣等

自十一日以後分兵追剿賊匪復由蓮花庵折至徐家山

臣明亮德楞泰督率提鎮侍衛將備等晝夜追逼斃賊復不下千名並生擒王三槐之妻王陳氏及幼女一口賊匪爭棄眷屬踉蹌奔逸現在大兵均於峩城山東北兩面及七里峽一帶併力圍捕近日由陝境竄入通江之賊復分兩股一由爛池子竄至巴州之黑山子欲與方山坪合夥一由王家壩翻山至東鄉中河之赫石寨爲糧道攸關與此刻徐添德等竄聚之徐家山地方相去不過一百餘里其勢益形牽掣臣伏誦

聖諭以爲官兵宜合不宜分賊匪利分不利合機宜所示

洞燭靡遺是以臣等再三籌酌如將現有兵力一時分顧太平則

此間兵力實單萬一偶有疎忽致令將次就盡之賊匪徐

添德等復肆鳴張正所謂顧彼失此萬萬不敢幸運日以

來節據太平一路文武稟報竄至城口之賊本揚言欲入

大甯經臣飭令都司李廷臣督率鄉勇迎擊於後園山一

帶堵禦甚嚴未能竄合仍退入修溪壩等處屯紮其竄至

漁渡壩者經李鋐謝開先等帶領鄉勇先於鹽廠關地方

堵禦未能過界又竄至秋波梁適臣派往之朱射斗到彼

迎頭截殺斃賊數百人現經該鎮督率參將王清弼遊擊

王威甯於清化溪蔡家溝長壩石岸口分布堵勦兵勇頗

爲得力其竄至竹峪關之賊亦經署通江縣知縣余陳策
署守備馬國柱團練鄉勇於響塘坡洪山塘一帶嚴行防
範不敢窺伺縣治以上各路情形辦理尙屬鎮靜但撥去
官兵及所募鄉勇堵禦則尙可支持勦辦則究屬不足且
該處地方遼闊查惠齡等所帶官兵自己早抵陝蜀交界
臣已飛咨惠齡等酌留官兵五六千名預防賊匪折回興
安之路其餘官兵惠齡自必察看形勢或另覓道路繞出
賊前或從賊後衝擊而出一抵川境合之朱射斗等所帶
官兵相機勦辦又恐後路兵丁力量稍疲計算前調撤拉
爾回兵正可趕到應一併檄令來至太平以供調派如此

辦理此一路旣無兵分力薄之虞而太平一帶仍可收前後夾擊之效所有自通江分竄之賊其旣到黑山子者如果竄入方山坪正屬自投陷阱可爲一鼓殲擒之舉惟繞至東鄉中河赫石寨之賊現與徐添德等相距不遠而中河後一帶均係達州東鄉太平往來糧餉要道臣等此刻一面設法擒捕首逆一面知會穆克登阿毋庸前赴通江卽帶兵前赴赫石寨務將此股賊匪全數殲除不得任其滋蔓至大甯賊匪前已遵

旨令觀成到彼督辦刻下正在設法進兵該處距城口路徑或八九百里或六七百里不等其勢未能聯絡惟於竹山竹谿

相去較近臣現在飛咨劉君輔馬瑀徐昭德等於川楚邊

界認真防範如果該處地方甯謐並令該提鎮內酌派一員帶兵馳赴大甯協同觀成攻剿於事當更爲有裨總之刻下賊匪旣已竄入川省則較之蔓延各省之時自覺易於勦辦但賊匪狡詐伊等雖名爲同教而勢力各有不同察其形跡自必欲各據一處以爲牽制官兵之計臣體察大局在各路之布置固不可不周而重兵所在仍當以首逆爲重惟有仰仗

天威肅清一起再辦一起庶幾根株淨盡餘孽不致復萌
諭曰連日盼望宜縣等捷報幾於宵旰靡甯本日奏到之摺尙係

分兵布置堵剿各路竄入楚匪情形未爲滿意然調度尙爲得宜所有防堵之道員李鉉等如果始終出力著查明咨部議叙主簿蔣曰紀勦賊陣亡著咨部加等議卹

閏六月初四日

公偕宜縣明亮奏言臣等於十六日督率巴圖魯侍衛將弁兵勇人等搶占小峩城山徐添德等捨死抗拒兵勇奮力上撲殺死賊目劉學仙林潤二名賊匪五百餘人生擒賊目王敬張大壽二名參將齊齊克遊擊陳大定千總段大龍李春和外委劉國榮受傷陣亡我兵遂據小峩城山梁與賊所屯大峩城山相對賊匪自知力不能支十七日

五更乘霧雨潛竄我兵亟行追趕賊匪沿途將軍械什物
盡行拋棄又殺賊六百餘人及賊目熊永霞雷思榜二名
生擒賊目湯思淳湯國武二名賊匪狡猾性成一見官兵
即翻山爬嶺繞道奔走我兵皆攜帶乾糧竭兩晝夜之力
於十九日追至豐城場復行圍住查熊永霞係亭子舖首
先起事之犯劉學仙訊據眾供係攻陷東鄉時領眾戕害
副都統佛住知縣張寧陽之犯王敬湯國武係去歲打仗
先後戕害總兵袁國璜參將尙維岳之犯臣等隨分別將
該匪等梟首剴屍凌遲處死其楚匪竄至黑山子者經知
州常發祥帶領鄉勇截殺退屯秦家溝竄至中河者爲鄉

勇王道益截殺適提臣穆克登阿帶兵趕至奮勇追擊賊

臣

匪遂逃至太平之固軍壩據險屯紮其在漁渡壩者亦由竹峪關竄至後河羅文壩一帶焚掠柯藩帶兵自陝趕至

沿途剿殺甚多追至官渡場臣

臣

前派往迎剿之總兵朱射

斗亦自太平趕至兩面夾擊臣等查現在所存匪黨不過二千餘人而逆首未獲臣

臣

等未便聚守一處復公同商酌

臣德楞泰酌留兵三千名督同鎮臣

臣

達音泰木騰額剿辦

徐添德等餘黨臣宜縣率明興等臣

臣

明亮率索費英阿等

酌帶兵勇趕赴中河後河會同穆克登阿柯藩將固軍壩

官渡場賊匪剿盡卽馳赴太平城口計惠齡等已由竹峪

關入川自西而至其防守鄖陽邊界之劉君輔馬瑀等自已遵

旨酌派一人帶兵至大甯幫同觀成攻勦九龍池賊匪不日可以
蒇事自東而至三面會合所有竄至太平各股賊匪無難
以次削平惟北面陝西連界自安康至南鄭沿邊千有餘
里不可無兵防守柯藩已入川境未便復令轉回臣前咨
惠齡酌留兵四千名交秦承恩嚴密防堵尙有總兵富爾
賽署總兵田有成足資彈壓如此布置四面皆有重兵以
次收擒賊若分股竄逸即可分投撲滅若合併一處更可
一鼓聚殲卽防守之兵亦可步步進逼以勦爲堵庶幾易

卷之二十一

於歲事

諭曰宜縣等搶占小峩城山十七日五更賊又乘霧雨瀰漫之際潛行逃竄實屬可惡看此情形必是兵圍不固又令賊匪竄逸宜縣明亮德楞泰均著傳旨申飭現在賊匪竄往豐城場復經官兵追及圍住據稱酌留德楞泰與達音泰等帶兵三千名在彼勦辦此事卽責成德楞泰上緊搜捕不可不倍加奮勉以副委任所有殺賊陣亡之參將齊齊克遊擊陳大定千總段大龍李春和外委劉國榮俱著咨部加等優卹

十二日

公偕宜縣明亮奏言查楚匪三股入川一股屯聚太平之

城口其兩股先後由竹峪關至通江境內一股翻山至東鄉中河一股至東鄉後河一帶在中河者經臣等派穆克登阿帶兵堵禦追至固軍壩在後河者經柯藩艾如文沿途截殺追至官渡壩與前此派往太平之朱射斗兩面夾擊詎賊匪詭譎異常每股又各分爲數起後隊牽綴官兵且戰且走以便前隊得以晝夜狂奔二十二日臣宜縣明亮帶兵自普光寺起程其固軍壩之賊一見官兵並不接仗卽翻山思竄穆克登阿正隨後趕殺臣明亮適帶兵趕至將後隊之賊截住去路全行殲斃其官渡口之賊見柯藩艾如文與朱射斗兩面兵至亦不接仗分爲數隊由山

僻小路陸續奔逃散則藏匿樹林聚則扼據險隘一日之間遷徙無定時惠齡帶兵已至後河慶成德齡帶領馬隊先行趕到柯藩等知後起官兵已到遂星夜繞出賊前截住一股擊殺賊匪四百餘人惠齡等率兵趕到亦將後隊賊匪殲斃甚眾餘賊均從旁路奔至東鄉前河一帶屯劄臣宜縣明亮正督率將弁前進間途次接臣德楞泰來信

知於是日帶兵剿殺徐添德等自豐城場至白馬廟沿途擒殺七八百人惟聞城口之賊爲太平兵勇所堵不能竄合大甯遂率衆南奔分爲兩股一至前河將竄南壩場一至開縣之溫湯井距縣甚近派守備何峻佐石鼎成帶兵

五百名並調副將王承勲帶兵五百名赴開縣防守其南
壩場一路實爲東鄉新甯開縣總匯隘口需兵堵禦亟請
分兵前來臣宜縣思白馬廟亦係前河地方徐添德等旣

竄往該處而中河後河兩股楚匪及城口之賊又俱至前
河一帶自必欲與徐添德等勾合雖徐添德等餘黨現在
不過千餘而楚匪人數不下二萬有餘到處奔突急應分
投截殺當派穆克登阿星夜帶兵由間道繞至南壩場屯
劄與臣德楞泰聲勢相倚二十三日臣德楞泰督率達音
泰巴圖魯侍衛將弁等帶領漢土官兵鄉勇頭羅思舉李
子秀等帶領鄉勇分路剿殺徐添德等不敢抵敵卽捨命

奔逃官兵追至半頭山白秀山一帶正在掩殺之際其中
河後河及城口竄來之楚匪業已會合於山溝樹林內突
出數股號衣分青白藍三色步行在前騎馬在後我兵猝
然相遇向前接仗槍礮並發賊匪恃其人眾相持一二時
不肯稍退官兵奮勇前進殺死賊匪二百餘人生擒七名
賊始退郤分屯土黃壩至五保頂延長三十餘里時天色
已晚我兵遂在環子山屯紮其夜臣宜縣明亮與慶成柯
藩艾如文德齡等先後趕上二十四日臣明亮德楞泰等
分路進攻土黃壩五保頂等處馬步賊眾蜂擁前來經官
兵奮勇進撲槍礮並放擊斃騎馬執旗賊目三名奪獲賊

旗一桿上書新營總鎮葉發祥七字殺死賊匪五百餘人
搶獲刀矛九十餘件賊衆連夜奔竄我兵盡力追趕殺斃
四百餘人賊匪又分爲兩股一股千餘人竄至開縣之溫
湯井與城口之賊合夥一股萬餘人竄屯開縣之南天洞
火焰壩白巖洞一帶而徐添德王三槐等卽附此股之內
臣等公同商酌溫湯井距開縣六十里王承勲等帶兵數
百名以之防守則有餘以之剿殺則不足今又添賊一千
餘人必須添兵勦堵因派副將長春遊擊王霖宋浩修等
帶兵一千名鄉勇二千名迅往勦辦其南天洞火焰壩白
巖洞數處賊數既多且首逆多在其內臣明亮德楞泰穆

克登阿帶兵由南壩場繞赴賊前慶成柯藩艾如文德齡
由五保頂追擊其後惠齡舒亮於後河一帶搜捕清楚已
抵大堰壩卽日可以趕到恆瑞前經赴城口勦賊今城口
之賊南竄恆瑞亦自太平官渡一路趕來三面會勦賊匪
自無從遁逃至南壩場一路未便空虛留遊擊沈宗文帶
兵一千名鄉勇二千名駐守以防賊匪折回臣宜縣率同
明興索費英阿等亦駐南壩場爲各路策應惟查開縣之
臨江市其地爲水陸衝途屢獲賊犯俱供賊目等欲仍回
湖北滋擾臣等嚴飭該縣實力防範一面委通判英貴將
臨江市沿河船隻盡行撤赴上流多募鄉勇於沿河一帶

晝夜防禦又飭夔州府雲陽萬縣一體嚴加堵禦所有大江停泊船隻亦令撤回上流以絕賊匪奔竄之路並移行觀成劉君輔馬瑪徐昭德等加緊堵截以免竄合大甯賊夥查楚匪雖有二萬餘人不過與前此重石子香爐坪賊數相等加以惠齡等帶來之兵已倍於從前臣等惟有趕緊分途勦殺以期擒獲首逆掃淨餘氛

諭曰宜縣等奏官兵截勦賊匪情形所辦俱好賊匪雖尙有二萬餘人經大兵四面合圍想賊首聚集一處較易圍擒宜縣當趁此併力攻勦悉數擒縛勿使再有竄逸

二十一日

公偕宜縣明亮奏言查楚匪竄入開縣等處臣等同惠齡

慶成柯藩艾如文德齡於初一初二等日各帶兵勇分路

馳擊南天洞火焰壩白巖洞屯聚賊匪殲斃一千餘人生

擒陳一禮等四十三名其溫湯井之賊亦經穆克登阿率

同副將王承勲長春等進剿擒斬二百餘人餘俱翻山拚

命狂奔隨提陳一禮等嚴訊僉供匪衆欲往大甯合夥又

有一股欲到雲陽如遇官兵堵截卽仍走回開縣等語餘

無要供當卽正法臣等思該匪等現仍分股竄逃十分詭

詐或於密箐潛伏或卽盤踞險要牽綴官兵臣明亮德楞

泰由九子嶺一路追擊惠齡慶成柯藩由石筍溝一路追

擊臣宜縣率同明興索費英阿由三匯口前進爲各路策

應並派穆克登阿艾如文田有成各帶兵勇繞赴雲陽萬
縣一帶分投堵勦副將王承勲等在溫湯井一路堵截恒
瑞舒亮由太平一路將落後賊匪逐一搜勦趕赴穆克登

阿一路會兵合辦初五日

臣明亮德楞泰行至路陽驅惠

齡慶成柯藩行至陸家坪適值賊匪在燈盞窩阮家溝一
帶焚掠經兩路官兵分頭截殺慶成會同副都統銜六

七二等侍衛額爾金泰三等侍衛莫新都司岳甯阿及馬
隊官兵首先衝擊賊人放槍抵禦官兵冒烟直入賊人慌
亂奔逃殺斃賊匪二百餘人生擒劉爲正等三十七名惠

齡柯藩督率三等侍衛江鼎副將觀祥參將馬斌遊擊吳

三泰等帶領官兵奮力追殺殲斃一百餘人臣明亮德楞

泰率同達音泰及巴圖魯侍衛等繞至山溝橫衝擊殺賊

匪彼此不能相顧分投亂竄官兵箭射矛截斃賊三百餘

人生擒賊匪二十六名內有李榮貴一名訊係賊目又據

同供徐添德王三槐等節經官兵追殺祇贖一千餘人東

奔西竄因到處多有兵勇堵截總不能逃出東鄉縣界迨

後陝西過來幾股湖北同教之人會合一處都說陝西四

川交界地方今年八九月內還有起事之人日來又被官

兵殺了許多現在分作數起到處焚掠想往大甯雲陽萬

縣一帶逃走沿途多擄掠人口糧食亦是沿途搶奪等語
該犯等均受重傷俱卽梟示餘賊向雲安場一帶竄逃臣
明亮德楞泰同惠齡等仍卽分路趕緊追擊臣宜縣因方

山坪一路賊匪僅止百祥帶兵二千名駐劄大羅坪堵勦
未免稍單賊匪等若因大兵俱赴東南乘虛出巢滋擾達
州東鄉一帶該處爲轉運軍火糧餉總匯之區不可不預
爲籌備隨派朱射斗帶兵二千餘名馳赴大羅坪會同百
祥督率該處兵勇務將方山坪賊匪迅速殲除以免牽制
諭曰據宜縣奏籌辦糧運事宜諸凡妥協明亮德楞泰久歷戎行
且與宜縣在達州共事日久著責成督同上緊勦辦

二十六日

公偕宜縣明亮惠齡奏言川楚賊匪現在合夥狂奔已至
雲陽萬縣地方臣等沿途嚴密查察初十日據探弁報稱
初九日自南天洞竄逃賊匪有一股直撲萬縣一股直撲
雲陽經提督穆克登阿及總兵艾如文副將王承勲等督
率兵勇分投截擊賊匪不能衝突過境旋卽折回由分水
嶺落花坪等處奔竄臣明亮德楞泰率領官兵卽向分水
嶺追擊惠齡恆瑞慶成舒亮柯藩率領官兵向落花坪追
截臣宜縣率同明興索費英阿由三匯口至朱家壩一帶
策應並查興肇已抵溫湯并卽囑由開縣一路前進以防

賊匪竄逸十一日黎明各路官兵俱抵大涼山下該處係
雲陽萬縣接壤之地山梁袤長三十餘里賊匪竄踞山巔
若乘官兵經過之時從上壓下橫截去路所關非細臣等

察看形勢自須將各隊逐一分開繞路齊上使賊匪前後
左右四面受敵庶易得手隨卽公同商定

臣

明亮德楞泰

惠齡慶成恆瑞舒亮柯藩帶同總兵木騰額達音泰等分
兵五路並飭總兵富成德齡等督同將弁分布山腰埋伏
相機勦捕當卽鼓勇齊登城匪懲不畏死槍礮亂發擂石
齊下官兵蜂擁直前守備趙猶龍把總劉國興行營干總
楊存福首先搶上山巔殺死執旗賊目二人趙猶龍受傷

陣亡各兵四圍竝上登時殺死賊匪一千餘人賊衆慌亂
於懸巖密箐之中覓路逃竄我兵勇氣百倍跟蹤追捕往
來截殺餘賊逃至半山均經伏兵突起殲戮無遺擒獲李
添德等四十餘名訊據供稱徐添德王三槐與李全王廷
詔姚之富等昨在燈蓋窩阮家溝被官兵殺敗分路奔逃
因前面陳家山八角坪石崖壩等處有高方朱三姓係川
省邪教首犯探聞楚匪將到糾聚同教數千人內有方正
潮一犯領夥黨二三千人先入賊隊留高名貴等帶領四
五千人在陳家山八角坪屯聚阻截官兵並因陳家山等
處均係要道各遣小頭目再往附近糾約匪夥一二日內

即可到齊俟官兵追到或據高拒守或讓過一半衝截後路等語隨將該犯等概行梟示適柯藩途次仄口子擒殺哨探賊匪四五十人拏獲騎馬執旗賊目方正宗一名訊與李添德等所供相符臣等復悉心商議陳家山八角坪石崖壩等處均爲進兵必由之路若不將此新起賊匪悉行掃除勢必前後受敵因卽挑派得力鄉勇頭羅思舉帶精幹鄉勇數百名並令都司張朋酌帶兵丁攬雜其間假稱邪教夥黨已將官兵截退大師傅現在後面卽刻可到令招頭目前去接見一同趕上大夥行走等語臣等一面各帶原領官兵臣明亮由黃茅嶺進發臣德楞泰由龍潭

子進發惠齡慶成由西堂寺進發恆瑞舒亮柯藩由走馬坪進發約定十三日子刻在陳家山八角坪附近地方分路埋伏凡可竄逸之路一體安兵防堵是日黎明張朋所帶鄉勇已至八角坪將搶獲大涼山賊匪之旗站立山巔招展並吹動海螺果見山下四圍匪夥紛紛而出齊來山上探問羅思舉等卽如臣等所教向該犯等逐一告知並令伊等有名頭目前來見面隨有高名貴及方正潮之兄弟方正秀方正爵及朱添壽等率其徒眾四百餘人欣然前來張朋同羅思舉等將該匪等誘至臣等營前我兵四圍齊出將各犯悉數擒下尙有後來匪夥見高名貴等均

已被縛知爲官兵所誘當卽鳴鑼號召一時聚集三千餘人各執器械鳥鎗如飛而至欲將高名貴等搶回我兵號礮一響各路伏兵齊出層層圍裹柯藩帶領撒拉爾回兵翻越山梁一道抄至賊寨之後達音泰觀祥帶兵從山窪抄至賊寨之前其餘官兵分隊迎擊賊匪捨命抗拒兇悍異常臣等隨將首逆高名貴等押送大營並將賊眾四百餘人駢斬一面鼓勵官兵奮勇圍殺直至酉刻將抗拒賊匪三千餘人殺盡分兵於山溝樹林之內生擒老幼一千餘名直至十四日申刻搜獲罄淨賊匪房屋悉行燒燬奪獲鳥槍刀矛一千三百九十餘件存留備用牛馬二百餘

匹頭米穀百餘石分賞滿漢屯土撒拉爾兵丁及各鄉勇

臣宜縣飭委川東道李憲宜等將生擒賊匪悉心研鞫除

從教各逆隨卽正法被擄上山者酌量保釋外其高名貴

一犯臣宜縣復親加提訊該犯首先傳教自雲陽以及附

近州縣輾轉傳授男婦已有萬人卽非該犯所傳習者亦

皆聽其號召賊黨俱稱爲老師傅此次該犯倡議糾眾於

陳家山一帶分立前後中左右五營實爲川省傳教首逆

其方正秀等俱各帶管數百人及千餘人不等亦屬緊要

頭目同惡共濟現在嚴行監禁臣等查該犯所供雲陽一

帶輾轉傳授人數多至萬人之語未便遽信而川東地方

伏而未動之賊自必不少亟須辦盡以期弭患未萌雲陽
萬縣雖有穆克登阿等督率將弁兵勇分投截剿第沿江
上下地方遼闊路徑叢雜恐尙不敷堵禦復令阿克坦布
訥音帶領官兵前往幫辦臣明亮等分路抄繞賊前臣宜
絲率同明興索費英阿等由臨江市前進搜捕餘匪並派
委妥員馳赴雲陽會同地方官將高名貴所供各教匪密
速查拏以期盡絕根株

諭曰此次宜絲分路剿殺並生擒川省另股賊匪閩摺內前幅鋪
敘情形竟似已將由楚竄入各匪殲盡及閱至摺尾現在各逆
仍未拏獲一人不爲滿意不值優加懋賞念其已將另起之賊

殲盡翦其羽翼辦理尙好宜縣明亮德楞泰著各賞金盒玉喜字牌大小荷包惠齡慶成恆瑞舒亮柯藩著各賞玉喜字牌大小荷包木騰額達音泰富成德齡著各賞玉扳指大小荷包柯藩擎獲賊目方正宗又帶領撒拉爾回兵翻越山梁抄至賊寨之後尤爲出力柯藩着加恩賞還花翎都司張朋豎旗誘賊著以遊擊陞用鄉勇羅思舉帶領鄉勇往誘賊匪亦屬可嘉著以千總卽補以示鼓勵

七月初六日

公偕宜縣明亮惠齡奏言川楚賊匪向雲陽一帶奔逃該處逼近川江意在搶船竄楚因水路防範周密從山路陸

續竄逃我兵分投前進並趕派將領繞道兜截

臣

明亮德

楞泰於十六日行至長壩見對面山梁屯賊三四百人當即鼓勵弁兵趕上攻擊賊匪並不接仗奪路竄逃俱經官

兵剿殺無遺隨據探事兵丁報稱十五日有賊匪四五千

人直撲雲陽縣城適副將長春督率兵勇趕到竭力剿殺賊匪退屯洞上西坪一帶又萬縣高陽壩地方亦有賊匪

數千人並經穆克登阿巴克坦布訥音艾如文等分兵截

殺

臣

明亮德楞泰當即趕赴雲陽與惠齡等相機援剿

臣

宜縣率同明興索費英阿由臨江市進發以爲各路策應

竊思前此獲犯高名貴供稱雲陽萬縣等處輾轉傳授多

至萬餘人若大兵併力向前追剿萬一各處新起賊匪截我後路或與方山坪之賊勾結蔓延更難辦理當卽知會穆克登阿等將高陽壩屯聚之賊趕緊剿洗卽在萬縣一帶防堵並派副將王承烈前往探視適侍衛烏什哈達帶領江西兵二百由襄陽前來卽令其隨營聽調維時興肇亦由溫湯井趕到亦囑速赴前敵十七日賊匪復由洞上西坪率眾進逼雲陽縣城千總蘇國棟把總馬瑔帶領兵勇四百名悉力抵禦賊眾捨命攻撲臣明亮德楞泰惠齡恆瑞舒亮慶成柯藩等帶領巴圖魯侍衛鎮將等分路趕到蘇國棟等見大兵已集鼓勵兵勇槍箭齊發賊匪始行

奔潰我兵內外夾擊殲戮賊匪六七百人奪獲刀矛三百
六十四件餘匪卽由香坪桂壩一帶逃竄該處路徑險峻
爲赴夔州大甯兩處要路賊眾既不能進犯雲陽勢必東
竄夔州或勾結大甯老木園之賊計圖就近奔逃湖北自
應趕緊截勦遇其去路隨卽飛咨觀成酌分官兵交劉君
輔等於要隘嚴密防堵臣明亮德楞泰卽由夔州大甯一
路繞出賊前惠齡等由香坪桂壩一路追擊十八日行抵
梅子壩拏獲哨探賊匪訊悉賊眾分屯雙河口洞裏壩一
帶隨經帶兵分路進攻詎賊匪詭譎異常已於五更時埋
伏前面深溝密箐之內止留二百餘人在彼放火當卽擒

殺殆盡惠齡恆瑞帶兵占住北面山梁柯藩帶兵於南面
山梁排列慶成富成繞上東面山梁忽聞施放號槍匪眾
一擁而出執持紅黃白三色大旗分撲官兵慶成富成同
巴圖魯侍衛等奮勇迎擊千總安慶把總張奇行營千總
閻俊烈徐有山司天貴馬兵劉發元等首先衝入黃旗賊
隊殺斃十餘名官兵一齊趕攏賊向東南敗竄惠齡恆瑞
柯藩督兵乘勢壓下斃賊五百餘名生擒賊匪唐之英等
八十餘名訊無要供當卽正法餘匪翻山越嶺逃至馬鞍
山七星壩一帶屯紮現在設法兜圍趕緊剿洗臣宜縣亦
於十八日接據副將王承勲稟報十七日帶兵至雲陽網

鹿溪因相距十餘里之椒子塘地方有新起賊匪千餘人
該副將督兵剿殺一百五十六人搶獲令旗十桿餘匪棄
寨奔逃並據川東道李憲宜稟報萬縣之董家營等處開
縣之水田壩白巖山一帶均有新起賊匪自千餘人至二
三千人不等四出滋擾運道梗塞等語查開萬雲陽一帶
邪匪紛紛響應卽當乘其初起急圖撲滅臣宜縣隨飛咨
舒亮由水田壩白巖山一帶進攻穆克登阿等由高陽壩
董家營等處截擊臣宜縣卽在開縣之蒲溪口地方紮營
務將各處新起之賊悉數殲除廓清後路仍卽馳赴前途
合力擒拏首逆此次各路打仗陣亡千總袁得亮李林書

把總王正剛馬沛應同陣亡受傷兵勇各部分別卹賞再
大兵現由開縣雲陽一路前進夔州道遠站長兵行無定
所須軍火糧餉最關緊要藩司楊揆道員李憲宜等均分
在新開一帶設法籌運而前敵已及數百里明興厯任封
圻自到營以來辦理軍務諸凡認真茲當糧餉轉輸喫緊
之際是以商令由雲陽直赴夔州督率夔州府張至軖等
稽查催趲務期妥速供支以資得力並查夔州所屬雲萬
等處居民驚避人夫雇募維艱臣現令楊揆於後路趕派
民夫三千名長驛數百頭星夜前往接濟

諭曰此次賊匪等由山路陸續奔竄節經官兵沿途截剿復從香

坪桂壩一帶竄逸經明亮惠齡等分路抄截賊眾又逸至馬鞍
山七星壩一帶屯聚現在設法兜圍而水田壩等處新起之賊
已派舒亮穆克登阿等分投截擊亦祇可如此辦理所有陣亡
之袁得亮李林書王正剛馬沛均著咨部加等優卹現在賊勢
總欲竄楚且各處新起之賊恐擾官兵後路自應亟添勁兵現
已降旨傳諭吉林黑龍江將軍等速挑勁旅三千名由驛起程
前來並令東三省豫備木蘭之兵一百餘名先著惠倫阿哈保
帶往襄陽一帶以備攻勦此項吉林索倫兵丁槍箭嫻熟先聲
所至足壯軍威